

Ogni
can
mena
la coa,
ogni
mona
dise
la soa

Discursi da ostarìa

Carta
canta,
vilan
dorme

Cuotidiano che vien fuora ogni tanto, che scolta, conta e smentisse tuto

Direzion, redazion, amministrazion, stanparìa, vèndia, luogo de nàssita, avvocato, magazin: TUTO DA PESSATI

El canton de Cavareta

La vita insegna, la televion copia

archivio

Sa inparemo calcossa xe da i nostri veci! Sentì sta storiela de Cavareta, contà senpre da elo stesso, al sòlito: *A 'ndasivino in giro pa'l mondo a vèndare ...miseria e de note a se fermàvino dove che capitava, dopo aver magnà calcossa par no remenarse inte'l sono. Na matina me só svejà, pi straco de la sera prima, e a i me compagni de viàjo go da èssarghe paresto on fantasma. So l'ostaria dove ca jèrino 'nda par bagnarse el bèco... "Cossa che te ghe, Angelin? - me dise uno - te ghe na ziera..." Tasi, ghe go rispòsto mi destiràndome i ossi e vardando staltri veciotti che i lotava za col quartin e co la so fame, a no go mai dormìo tuta stanote. "E come mai?", dise staltro. Cossa voto mai, me xe restà el cavareto sol stómego! I goti s'è fermà e vinti oci me ga vardà pieni de invidia. Nissuni saéa ca ghivino dormìo so na stala insieme a le càvare. El brevetto de la bèstia sol stómego no lo ga quilli del cinghiale par television, ma Angelin Cavareta!*

NO DESMENTEGARSE CHE...

Se ve xe scadù el bolo de la màchina el 31 de disenbre a podì pagarlo fin a la fine de zenàro, ma sa no ghì la màchina scoltème mi, fè de manco de pagarlo. Caso mai i ve metarà la mora. Ricordève, invezze, de farghe on regaletto a la fèmena par Nadale.

PREVISION DEL TENPO

Ga piovèsto cussì tanto che xe 'ndà par sora la pignata poco distante da Suisin e in giro par meza Rejon. Le prevision no lo ghèa dito, però, che senò se podéa fare calcossa, magari salvare tuto el polame che xe morto a Ospedaletto, par esèmpio. Adesso i fa le prevision del dì prima, cussì i xe sicuri de no sbaliarse. Sti mona!

Indovina indovinèlo...



**Chi che'l xe se vede presto,
ma coss'èlo tuto el resto?**

lo ciamava el giornale de le serve, parché el jera pien de monade da paese. Desso no i lo ciamà pi cussì, parché el scrive putanade come tuti staltri! E i inserti? Corriere economia, Io donna, Sette, Stile, Sport Week: E staltri? Famiglia cristiana, Quattro Ciàco-e... No i xe mai massa e ogni uno leze quello che ghe piase. Desso so le tole metarò le lavagnete, nò quele che se ghe scrivéa su col jesseto, quele moderne, a lètrico, che le ga drento tuti i giornài e anca di libri e parfin Internè. Sòì mi dove ca 'ndaremo a finire!

Tri giornài no basta

L'informazion prima del caffè

Tomaso

Ame só senpre domandà quanti giornài che ga da èssarghe in ostarìa. Da mi ghe ne xe tri, ogni matina: la Gazeta no la ga mai da mancare! Prima de ordinare el caffè el cliente varda se so le tole ghe xe la "Ròsea", po' el se chietà. Se capisse ca no posso tegnere solo el giornale sportivo, ghe vole anca l'informazion. E alora ghe xe el Corriere, 80 pàjine ogni matina! Na supa ca no so gnan mi come ch'i fa a inpenirlo. Se uno ga tempo no ghe basta meza giornata. Po' ghe xe el Gazetin, "organo locale"; na volta i

Ciàcole, proteste, barufe, telefonade de fogo, altroché!

La Pifania tute le feste porta via

La Veceta la ga portà carbon, caramele, mandarini, calendari...

El Mestro

El proverbio el xe fin massa ciaro. Dopo la Veceta xe ora de mètare a laorare da nuovo, che tute le feste le xe finie, insieme co panetuni, musiti, lentichie e tuto el resto. Co la xe passà par Suisin, ma anca par tuto el resto de la Provincia, La Befana la ga assà zo on paco pa'l Comune, on regaletto da mètare so la calza de tuti i tusiti del Paese che de regali i ghe n'èa bu anca par Nadale, paraltro. El Sindaco s'è incazzà co sta Veceta e, senza tanta educazion, el ghe ga mandà a dire che el so regalo pa' i tusiti la podéa anca tegnèrselo. Secondo mi la xe stà tuta na messa in sena par farse reclan, tanto xe vero che po' el xe stà scritto so tuti i giornài. Ma come, Sindaco, i to capi i vole farghe on regalo a i tusiti del to paese e ti, no solo te vèrzi el paco - che no la xe educazion - ma anca no te còmoda cossa che ghe xe drento e te ghi'o mandì indrìo... E i tusiti? Come ghe sarà restà i nostri tusiti che so la calza i ga catà solo el carbon, calche mandarini e le solite caramele? Te sì fortunà, Sindaco, che no te può pi presentarte a le votazion e che, a ogni modo, i tusiti no i vota gnan-cora, senò la to carega la passarà de sicuro de man, int'on gesumarìa.

Létara al Direttore

L'Estracomunitario

Na sera del disenbre de l'ano passà, so la circonvallazione de Mozzéese, ghe jera na sgnarà de tusi e tose, in fila ordinà, soto na piova che dio la mandava, lì che i spetava de 'ndare drento a na botega de roba da vestire, parchè jera scomincià le svèndie par via che la botega sarava. Al cominzo de l'ano nuovo la television ne ga fato védare l'assalto inte on "outlet" (mèteghela tì la traduzion in dialeto nostran visto che te si el mestro), mejari de parsona ga invaso le boteghe, facendo casin par tute le strade del luogo, inpinando tuti i posti justì e sbalià par parchejare le machine. Ga dovesto intervenire la protezion civile e la polizia. El direttore de sto outlet, intervistà da la television, contento d'i afari, ga concluso "auspicando" (cussì capisse tuti) "la fattiva collaborazione della forze dell'ordine e della protezione civile, per i prossimi giorni". Ora capisso ben che le forze de l'ordine gàbia da èssare presente dove che ghe xe casin, ma la protezion civile cossa ghe èntrela? No la sarà mia come el par-simbolo? Ritornando ai assalti a le boteghe: ma me voto spiegare sto bisogno desperà de cronpare a costo de gravi sacrifici (fila, piova, ressa, viajo, disagi vari) ste strazze firmà/scontà. Voto farme credere che no i ghèa pi gnente da métarse intorno? No i sarà stà mia tuti nudi par caso? Forse che na majeta firmà la fa pi bon, pi intelijente, pi belo? Cossa deventarali co sta roba firmà intorno! Te lo domando a ti, che oltre che mestro te si spsicologo spsichiatra. Parché i nostri fiòdi, le nostre vissare xe cussì difarenti da noantri? Ghe-mo sbalià noantri, o semo sbalià noantri?.

El direttore risponde, volentiera...

Caro Extracomunitario. Capisso el to sfogo, che se'l fusse de pele la sarìa salute par le buele, come che dise el proverbio. Mi, però, no ghe entro gnente co sti "fenomeni di massa", come che li ciama i sociòloghi che i xe esperti so ste facende. Tuto vien dal mondo de la publicità, che i ghe mete in testa a la zente - e no solo a i tusi - che se te fè come che dise ili te si "trendy", cioè a la moda, sendò te si on mona. La facenda la sta tuta qua e ti te ghè rason da vèndare (feto svèndie..?). Se po' no te sé cossa che vol dire "outlet", allora la costion la xe nantra. Ti te fè parte de na jenerazion de ignoranti che la se lamenta d'i tusi parché ili sa l'inglese e voaltri nò. So questo a si sbalià voaltri.

Record: a butemo via pi roba de quella ca magnemo Parfin el loamaro no tira la zéngia

Tusiti massa grassi e tusiti che muore de fame

Jani Raise

So sti ultimi tempi, in ostarìa go provà a sentarme da mi solo, facendo finta de lèzare el giornale, ma co la recia pronta a sentire i discursi che vegnéa fati da i presenti. Se parlava de la crisi de governo, che pararia che la vegnesse on di sì e un di nò, a seconda de come che i se alza a la mtina; se parlava del lodo Alfano, che pararia che 'l servisse solo par salvare el Capo; e de le scoàzze de Napoli, e di'e responsabilità che gavaria Bassolino o la Jervolino, e de la zente che la xe stufa de promesse mai mantegnù... Se parlava de tosete copà dal solito maniaco, de soldadi mazzà so na guera ch'i ne fa credere che no la xe na guera. Se parlava de funghi e de cachi, se parlava del nuovo sistema de raccolta de le scoàzze a Suisin; se parlava de tante robe. Insuma, i soliti discursi da ostarìa. No go sentio però, mezzonare na notizia che invezze la me ga colpìo mi: a butemo inte'l loamaro on mùcio de magnare che invezze el podaria servire par cavarghe la fame a tri miliardi de persone. E pensare che al mondo ghe xe 952 miliuni de cristiani che tira la zéngia (che quili che la porta la ghe xe diventà tanto curta che no la ghe basta pi par farghe d'i busi nuovi) e i muore da fame. Allora me xe vengnù d'i pensieri par la testa. Secondo mi sta roba no la pole 'ndar vantì par tanto tempo parchè, se quisti che tira la zéngia i vien savere che noantri a butemo inte'l loamaro tuto sto bendedio, prima o dopo i ne càpita qua a torse quello che noantri a butemo via e no credo ch'i vegnarìa col capelo in man. E i gavaria rason... Quanti tusiti xe che muore parchè no i ga gnente da magnare? Sta domanda la me ga fatto fare nantra riflessione, che la xe questa: qua in te'l mondo del "benessere" a ghe-mo on problema che 'l xe quello che i nostri putini i xe grassi parchè i magna massa. I magna massa parchè noantri grandi no semo pi boni insegnarghe che bisogna magnare quello che basta e no quello che i oci vede; e parchè par la television i fa reclan de magnare al Mec Dònal e altre marende piene de porcarie. A me ricordo che quando ca jera piccolo (de età, che de statura a ghe só ancora) me mama la me preparava on tochetto de pan con on fià de margarina e na spolvarada de zùcaro. Allora anca ste calorie a le brusàvino corendo su e zo pai canpi, saltando la Roteèla, zungando a banditi, a ciapa scanpa, a schinche o a alto de tera. Par lavarse la cossienza a ghe-mo inventà la giornata europea contro el "spreco alimentare", senza darse da fare par riussirghe. Insuma, spreco so spreco, forse sarìa mèjo ca se dèssino na registrada tuti quanti comprando solo quello che se riesse magnare. Forse, facendo so sta maniera, tuti quanti podaria 'vere la so scudeleta de minestra. Xela o no xela na notizia?

La mostra de le fotografie

On successo!

Ciò, ghe xe stà na marèa de zente a visitare la mostra de fotografie In Ostarìa. On successo, da no maravejarse tanto, par via del fato che xe sta messe in mostra de le robe da veri artisti de la machineta fotografica. Na otantena de fotografie, una mèjo de staltra, fate da na quindesena de maghi del cliché.

